

VIRGINIA.

parte accolat habet, ad Austrum *Wigcomoco*, cui milites parent 130 : *Sekacowone*, cui 30 militant, & *Onawmanient*, cui centum: *Pantawomeke*, cui 160. Hic in tria quatuorve flumina dispescitur, quorum maximum *Quiyough* appellant. Ad Boream sunt, *Secowocomoco*, 40 stipendiariis militantes: *Potapaco*, 20: ad Orientem *Pamacacack*, bellatores alit 60 : *Moyowances* 100 : *Nacothancke* 80.

Pauvuxunt.

Quinto fluvio nomen est *Pauvuxunt*, qui minor est aliis, piscibus luxuriat supra quam reliqui. Populorum nomina sunt, *Acquintanacksnack*, *Pautuxunt*, & *Mattapanient*. Hi morum civilitate in hospites, & facilitate, aliis gentibus præstant.

In Orientali Sinus magni ripa fluvii sunt *Vockwog*, *Rapahanock*, *Kuskarawoack*, *Tams*, *Wichocomoco*, *Acobanock*, *Accomack*.

Fructus.

Quamquam autem Virginia vegetantia quamplurima proferat, gramen tamen parcius protrudit, eo quod aquæ ex arboribus lapsæ sub se posita gramina exstinguant, cui malo arborum exstirpatione occurri posset. Maxima hic quercuum est multitudo, quæ glandes proferunt triplicis generis, inter illas quædam cortice albicant, suntque suavioris saporis, ex quibus elixis oleum extundunt, ungendis corporibus aptum. Etiam ulmis abundat & fraxino, cujus ligna in cineres exurunt mundandis vestibis idoneos. Cypressos quoque habet & nuces juglandes. Prope indigenarum domicilia mori sunt proceræ admodum. Nuces quoque avellanas hic reperias, quæ nostratibus non cedunt. Pruna triplicia, quorum quæ rubra & alba sunt, ea referunt, quæ in rubis vepribusque crescunt. Verum illud prunorum genus, quod *Putchamins* vocant, altitudine æquat *Palmites*. Fructus mespilo similis est, primum viridis, mox flavus, & ubi maturuerit, ruber: nondum maturus non sine dolore os adstringit, maturus vero delicatissimi est saporis. Nec cerasa hic desideres, nostris majora; non vites, quæ in arborum cacumina altius exspatiantur, licet minus frugiferæ. Est & aliud hic uvarum genus, quas *Messamines* vocant, quæ pinguioribus sunt, & crassioris succi, cerasorum magnitudine, non tamen, ubi pressæ fuerint, saporis grati. Est & alius fructus involucri suo inclusus, instar nucum avellanarum, cujus nux glandem refert, quamque in deliciis habent, sua lingua *Chechinguamens* vocant. Est & uva crispæ non absimilis, magnitudine, colore & sapore, *Ravocomenes* appellant, quam modo coctam, modo crudam comedunt. Præter hosce fructus populum ea tellus gignit albam, aliamque, quæ gummi resinamque de se præbet, qualis Terebinthina est, quidam pro balsamo habent. Nec cedri absunt, arboresque, unde lignum *Sassafras* habetur. In vallibus humidioribus uva crescit, quam *Ocoughtanamens* nominant, eam capparibus non difforem æstivo tempore exsiccant, & quoties ea vesci cupiunt, aquis dimidium diem excoquunt, alias venenatam noxiamque. Ineunte vere, aptas acetariis her-

bas reperias, violas puta, portulacam, acetosam &c. Præcipua optimique nutrimenti radix, *Tec-kawouge* vocatur, in lutosiis crescens locis. Pyrethri quoque radices probatissimæ hic colliguntur.

Anni tempora quinque numerant: Hyemem, illis *Papanow*: Ver, illis *Catapewck*: Æstatem, illis *Cobattayough*: cum spicas ferre incipiunt frumenta, *Nepinough*: & Autumnum, illis *Taquitock*. A Septembri ad Novembrem usque præcipua celebrant festa, annualque solennitates.

Animalia si quæras, cervos plurimos habent, Europæis similes, maxime in sylvis prope fluviorum ostia degentes. Animal ibi reperitur nomine *Aroughcum*, fibro persimilis, in arboribus victitans, uti solet scilurus. Quos vero illic videas sciluros, minores cuniculos nostrates adæquant quantitate. *Assapanick*, scilurus nobis volatilis vocatus, quod ob celerem cursum volare videatur. *Opassom* caput habet porci, caudam gliris, magnitudine felis, sub ventre pendulo veluti sacco prolem fert, ac fovet. *Mussasus* forma, indoleque glirem aquaticum imitatur, sed muscum redolet. Lepores pauci sunt, & non majores nostris cuniculis. Apri quoque non ejus magnitudinis, cujus sunt Moscovitici & Tartarici. Fibri pares sunt magnitudine cum canibus aquaticis; sed brevipedes, suntque anteriores, quales canum, posteriores, quales olorum: depiles adhæc sunt; & uti judicant barbari, nutrimenti, succique optimi. Canes, luporum instar non latrant, sed ululant. Lupi non majores sunt vulpibus. Martes, & mustelas hic esse ex pellibus colligas. Illud mirum, animalia hujus terræ gallinis nostratium earumque pullis minime nocuisse, neque ovis insidiari, non etiam nocere angues, muscasque, quæ in Australibus Indiæ Occidentalis partibus nocent graviter. Ex avium genere aquilas habet, falcones, perdices, pavones Indicos, nos hic *Calcoeten* vocamus, turdos rubris maculis. Brumali tempore apparent cygni, grues, ardeæ, anseres, anates, plittaci & columbæ. Piscium variorum sunt species: accipenser, tursiones, vituli marini, rajæ, salmones, trutæ, soleæ, passer, haleces, anguillæ, lampetræ, perca trium generum, cancri, astaci, ostrea, & mituli. Est & pisciculus forma mirabili, draconem S. Georgii referens, exceptis alis pedibusque.

Animalia.

Aves.

Pisces.

Minus populosa sunt regiones, viri pauci, mulieres puerique plurimi. Prope civitatem *James Towne* sexaginta mill. ambitu, quinque circiter hominum sunt millia, milites circiter quingenti. Quo tempore Ducem Ioannem Smith captivum abducebant, sexcenti aderant, nec visi plures simul ac juncti. Staturæ admodum sunt inæqualis, alii proceri, gigantea pene magnitudine, alii nanis proximi. Capite semitonso incedunt, qua in re opera uxorum utuntur, quæ conchis duabus junctis capillos refecant. Femina quoque promissum capillitium, longioresque cincinnos alunt. Pedes iis, manus, mamma, facies punctu-

Populi mores, vestitus, ædificia, politia.